



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.136/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët Kymete Kicaj kryesuese, Arsim Hamzaj dhe Skender Çoçaj anëtarë, duke vendosur përkitazi me ankesën e subjektit politik Lidhja Demokratike e Kosovës (LDK), me seli në Prishtinë, paraqitur kundër subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme të Kuvendit të Republikës së Kosovës që do të mbahen me datë 09.02.2025, në seancën e panelit të mbajtur me datë 24.01.2025, mori këtë:

VE N D I M

REFUZOHET e pabazuar ankesa A.nr.136/2025 e datës 23.01.2025, e parashtruar nga subjekti politik Lidhja Demokratike e Kosovës (LDK), me seli në Prishtinë, kundër subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme të Kuvendit të Republikës së Kosovës që do të mbahen me datë 09.02.2025

A r s y e t i m

Me datë 23.01.2025, PZAP-i, ka pranuar një ankesë nga subjekti Lidhja Demokratike e Kosovës (LDK), në të cilën pretendohet se LDK dega në Prishtinë, ka vërejtur se Lëvizja Vetëvendosje, ka shkelur neni 34 paragrafi 1 nën paragrafi 1.2, me rastin e vendosjes së njoftimeve brenda ndërtesave publike apo godinave për tubimin politik që do të mbahet në Kodrën e Diellit me datë 23.01.2025.Parashtruesi i ankesës ka bashkangjitur si prova foto ne cilat shihen njoftimet e shpërndara.

Më datë 23.01.2025, PZAP-i, e njoftoi subjektin politik Lëvizja Vetëvendosje (LVV), për ankesën e paraqitur kundër tyre, duke i dërguar kërkesë për përgjigje deri me datë 24.01.2025 në ora 10:00, ku në përgjigjen në ankesë subjekti politik thekson se ankuesi nuk ka ofruar dëshmi të qarta dhe bindëse me anë të cilave do të identifikohet dhe saktësohet vendi se ku janë vendosur njoftimet e tilla si dhe ne vlerësojmë se vendosja e këtyre njoftimeve pa u ditur objekti dhe vendi i saktë, janë bërë me qëllim nga pretenduesi për të denoncuar LVV-në për këtë shkelje e cila realisht nuk ekziston.

PZAP-i, pasi që shqyrtoi dhe vlerësoi pretendimet ankimore gjeti se:

Ankesa është e pabazuar.

Pretendimet ankimore të parashtruesit të ankesës se Subjekti Politik e Lëvizja Vetëvendosje, ka shpërndarë material zgjedhor/njoftime brenda ndërtesave publike apo godinave për tubimin politik janë të pa qëndrueshme dhe si të tilla i refuzoj për faktin se veprimet e përshkruara në ankesë nuk paraqesin shkelje të dispozitës së nenit 34 paragrafi 1 nën paragrafi 1.2 të Ligjit Nr.08/L-228 i cili përcakton” *Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim, paragrafi 2.2 vendosa e njoftimeve, pllakateve dhe postëreve , ose përndryshe, vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugë publike, në shenjat e trafikut publik, brenda ose jashtë hapësirave ose ndërtesave të zëna, ose, ndryshe, që shfrytëzohen nga organizata ndërkombëtare, ose brenda ose në hapësirat private pa lejen e pronarëve ose shfrytëzuesve”, pasi që në fotografit e bashkangjitura në ankesë shihen vetëm disa njoftime të shpërndara në hyrje të banesave*

Në bazë të provave të bashkangjitura shkresave të lëndës dhe pretendimet e palës ankuese paneli vlerësoi se pretendimi ankimor për shpërndarjen e njoftimeve brenda ndërtesave për tubim publik janë të paqëndrueshme dhe si të tilla Paneli i refuzoi për faktin se subjekti politik LDK nga veprimet e përshkruara në ankesë dhe nga provat e ofruara si dëshmi , nuk ka arritur që të vërtetoj se këto veprime janë ndërmarr nga subjekti politik kundër të cilit është paraqitur ankesa, për të ardhur në përfundim se janë bërë shkelje të dispozitave të lartcekura të Nenit 34 paragrafi 1, nën paragrafi 1.2 të Ligjit Nr.08/L-228 Për Zgjedhjet e Përgjithshme në Republikën e Kosovës, dhe sipas Rregullës NR.01/2024 për Procedurat e Parashtrimit dhe Vendosjes së Ankesave, neni 5, paragrafi 1. nën paragrafi 1.3 ankesat që dorëzohen në PZAP për shqyrtim duhet të përmbajnë këto të dhëna:1.3.Kohën, datën dhe orën kur ka ndodhur shkelja, ku në rastin konkret parashtruesi i ankesës nuk ka dhënë hollësi që të dihet se ku janë shpërndarë këto njoftime, në cilën datë ka ndodhur shkelja e pretenduar dhe nga provat e ofruara nuk mund të identifikohet objekti se ka ndodhur shpërndarja e materialeve zgjedhore andaj në prani të këtyre rrethanave ankesa është refuzuar si e pabazuar.

Keshtu që paneli vlerësoi se parashtruesi i ankesës në mbështetje të pretendimeve, nuk ka ofruar dëshmi të qarta dhe bindëse, edhe pse në kuptim të nenit 117 paragrafi 3 të LZP-së, barra e të provuarit bie mbi ankuesin, në rastin konkret të provuarit e asaj se shkelësit e supozuar kanë shpërndarë material zgjedhor në hapësira të palejuara konkretisht në ndërtesa, nuk është dëshmuar me prova nga pala ankuese.

Nga arsyet e theksuar më lartë duke bazuar nënin 117 paragrafi 3, neni 118 paragrafi 1 të LZP-së, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa
Anr.136/2021 më datën 24.01.2024

Kryesuesi i Panelit
Kymete Kicaj



Këshillë Juridike: Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimet të këtij vendimi.